



14 Rhagfyr 2021

Annwyl Aelodau,

Yn ychwanegol i fy lythyr ar y 29ain o Dachwedd 2021, rwy'n ysgrifennu atoch i roi'r wybodaeth ddiweddaraf ichi am y fersiwn ddrafft o God Addysg Cydberthynas a Rhywioldeb a'r canllawiau statudol ategol.

### **Cod Drafft Addysg Cydberthynas a Rhywioldeb**

Mae Addysg Cydberthynas a Rhywioldeb yn ofyniad statudol yn fframwaith Cwricwlwm i Gymru ac mae'n orfodol i bob dysgwr o 3-16 oed.

Mae gan Addysg Cydberthynas a Rhywioldeb rôl gadarnhaol ac amddiffynnol yn addysg dysgwyr. Mae gan ysgolion a lleoliadau rôl bwysig o ran creu amgylcheddau diogel a grymusol wrth gefnogi hawliau dysgwyr i fwynhau cydberthynasau boddhaus, iach a diogel drwy gydol eu bywydau.

Bydd Addysg Cydberthynas a Rhywioldeb yn cael ei gweithredu mewn ysgolion cynradd, ysgolion meithrin a gynhelir, a lleoliadau meithrin nas cynhelir o fis Medi 2022.

Mae'r byd o'n cwmpas yn esblygu'n gyflym ac yn sylweddol. Fel cymdeithas, rydym yn dod yn fwyfwy ymwybodol o'r canlynol:

- newid mewn strwythurau a pherthnasoedd teuluol
- newid mewn normau cymdeithasol, diwylliannol a chrefyddol mewn perthynas â rhyw, rhywedd a rhywioldeb
- datblygiadau mewn technoleg gan gynnwys dylanwad cynyddol y cyfryngau cymdeithasol a mwy o ddefnydd o gyfathrebu a dyfeisiau digidol,
- newid cyfreithiau a hawliau o ran cydberthynasau, rhyw, rhywedd a rhywioldeb.

Yn y cyd-destun hwn, mae Addysg Cydberthynas a Rhywioldeb yn gymorth pwysig i alluogi dysgwyr i wynebu'r newidiadau hyn.

## Trais yn Erbyn Menywod, Cam-drin Domestig a Thrais Rhywiol ac Addysg Cydberthynas d a Rhywioldeb

Mae hyrwyddo a chefnogi cydberthynasau iach eisoes yn agwedd allweddol ar ein dull o roi terfyn ar Drais yn Erbyn Menywod, Cam-drin Domestig a Thrais Rhywiol, ac o ystyried natur hirdymor ein huchelgais, mae eisoes wedi llywio'r Cwricwlwm newydd i Gymru.

Bydd strategaeth ddrafft newydd Llywodraeth Cymru ynghylch Trais yn erbyn Menywod, Cam-drin Domestig a Thais Rhywiol yn ategu'r Cod newydd ar gyfer Addysg Cydberthynas a Rhywioldeb a'r canllawiau statudol a bydd yn sail i hawliau dysgwyr i fwynhau cydberthynasau boddhaus, iach a diogel drwy gydol eu bywydau. Dylid darllen y canllawiau statudol ar Addysg Cydberthynas a Rhywioldeb ochr yn ochr â'r Cod ac mae'n cynnwys cyfeiriad penodol at Drais yn erbyn Menywod, Cam-drin Domestig a Thrais Rhywiol a chyfeiriadau uniongyrchol at drais yn erbyn menywod. Cafodd cyfeiriad at y Ddeddf Trais yn erbyn Menywod, Cam-drin Domestig a Thrais Rhywiol ei ddileu o'r Cod oherwydd nad oedd yn dechnegol gywir gan ei fod yn cyfeirio at sancsiynau cyfreithiol nad ydynt yn rhan o'r Ddeddf.

O fewn y canllawiau statudol newydd ar Addysg Cydberthynas a Rhywioldeb, mae'n amlwg y dylai'r dull o ymdrin ag Addysg Cydberthynas a Rhywioldeb fod yn gadarnhaol, yn amddiffynnol ac yn ataliol, gan ystyried sut y gallai fod angen cefnogi dysgwyr i 'gael yr wybodaeth i adnabod pob math o wahaniaethu, trais, camdriniaeth ac esgeulustod, gan gynnwys trais yn erbyn menywod, cam-drin domestig a thrais rhywiol' ac mae dolen wedi'i gynnwys mewn pecyn cymorth o adnoddau i gefnogi ysgolion a lleoliadau ar y mater pwysig hwn. Mae'r canllawiau yn cyd-fynd â Chanllaw Arfer Da: Dull Addysg Gyfan o Ymdrin â Thrais yn erbyn Menywod, Cam-drin Domestig a Thrais Rhywiol yng Nghymru a pheccyn cymorth Llywodraeth Cymru a ddatblygwyd gyda Chymorth i Fenywod Cymru. Mae'r canllawiau statudol hefyd yn rhoi mwy o sylw i addysgu a dysgu ac yn awgrymu dulliau posibl a fydd yn cefnogi hyn a bydd adolygiad gan gymheiriaid Estyn o aflonyddu gan gyfoedion mewn ysgolion yn sail pellach i'r gwaith o ddatblygu a chyflawni hyn mewn ysgolion.

Mae'r canllawiau statudol wedi'u datblygu ac yn gwneud yn fwy clir o ran addysgu a dysgu i gefnogi'r gwaith yma. Yn fwy cyffredinol, rydym yn parhau i hyrwyddo cydberthynasau iach yn y ffordd rydym yn cefnogi teuluoedd ac unigolion sy'n agored i niwed. Trwy hyrwyddo cysyniad cyson o natur cydberthynasau iach, byddwn yn cefnogi ein dull cymdeithas gyfan o roi terfyn ar gam-drin menywod a merched yng Nghymru. Bydd ein strategaeth newydd yn cael ei chyflawni drwy ddull partneriaeth gwirioneddol gan gynnwys addysg, iechyd, yr heddlu, gwasanaethau arbenigol a goroeswyr i greu *Glasbrint ar gyfer gweithredu*.

Roedd nifer o sefydliadau yn cefnogi'r gwaith o ddatblygu'r canllawiau a'r cod statudol ar gyfer Addysg Cydberthynas a Rhywioldeb a fydd yn cefnogi diogelwch dysgwyr, drwy eu galluogi i adnabod cydberthynasau a sefyllfaoedd anniogel neu niweidiol.

### Cydraddoldeb a chynwysoldeb

Mae cydraddoldeb a chynwysoldeb wrth wraidd yr egwyddorion sylfaenol ar gyfer Addysg Cydberthynas a Rhywioldeb:

Yn unol â gofynion gorfodol y Cod Addysg Cydberthynas a Rhywioldeb, caiff Addysg Cydberthynas a Rhywioldeb ei darparu mewn ffordd sy'n gynhwysol yn unol ag egwyddorion cydraddoldeb. Mae hyn yn helpu i sicrhau bod dysgwyr yn gallu gweld eu hunain, eu teuluoedd, eu cymunedau a'i gilydd yn cael eu hadlewyrchu ar draws y cwricwlwm ac yn gallu dysgu gwerthfawrogi gwahaniaeth ac amrywiaeth fel ffynhonnell o

gryfder. Mae hyn yn cyfrannu at gymdeithas gydlynol, deg a theg sy'n rhoi sgiliau i ddysgwyr am oes. Mae hyn, wrth gwrs, yn cynnwys cydraddoldeb rhywiol a chynwysoldeb LHDTC+.

Mae dysgwyr yn tyfu i fyny mewn byd lle mae rhywedd a hunaniaeth rywiol, diwylliannau, hawliau a deddfwriaeth yn newid neu'n esblygu ledled y byd. Er mwyn bod yn effeithiol, rhaid i Addysg Cydberthynas a Rhywioldeb sy'n gynhwysol ddechrau'n gynnar. O oedran ifanc gall dysgwyr ddysgu am eu natur unigryw eu hunain, sut i werthfawrogi amrywiaeth a pharchu hawliau pobl eraill. Dyma'r sylfaen ar gyfer symud nes ymlaen i archwilio amrywiaeth mewn cydberthynasau, rhywedd a hunaniaeth rywiol ac ar gyfer datblygu'r sgiliau a'r gwerthoedd sydd eu hangen i feddwl yn feirniadol am normau, hawliau ac annhegwch rhywedd a rhywiol. Dylai hyn gynnwys ystyried ystod o ddylanwadau sy'n llywio ein gwerthoedd a'n hunaniaeth. Dylai helpu dysgwyr i ddatblygu dealltwriaeth o wahanol werthoedd, credoau crefyddol ac euogfarnau anghrefyddol a all lywio ein gwerthoedd a'n hunaniaeth o ran cydberthynasau a rhywioldeb.

### Cyfnodau sy'n briodol yn ddatblygiadol

Dylai ysgolion roi sylw i'r llinynnau gorfodol o gynnwys sy'n briodol yn ddatblygiadol o fewn y Cod Addysg Cydberthynas a Rhywioldeb i ddatblygu eu dull gweithredu, a dylent gydnabod datblygiad ac anghenion cymdeithasol, corfforol, emosiynol a gwybyddol dysgwyr wrth gynllunio.

Mae'r cyfnodau wedi'u cynllunio i helpu ysgolion a lleoliadau i lunio barn ynghylch a yw dysgu'n briodol yn ddatblygiadol i ddysgwyr penodol. Mae'r oeddrannau a nodir yn y cod yn nodi'n fras pryd y dylai ymarferwyr ddechrau ystyried a yw'r dysgu mewn cyfnod yn briodol yn ddatblygiadol i'w dysgwyr.

Gall hyn olygu y bydd rhai dysgwyr yn barod ar gyfer dysgu penodol cyn yr arwyddion bras a nodir yn y Cod, ond yn yr un modd gall olygu bod angen cyfle i rai dysgwyr ddatblygu ymhellach cyn iddynt ymgysylltu â dysgu penodol.

### Pornograffi

Mae'r Cod wedi'i gynllunio i gydnabod anghenion a phrofiadau dysgwyr. Mae diogelwch ar-lein, cydsyniad ac iechyd rhywiol oll wedi'u cynnwys yn y Cod ar gamau sy'n briodol yn ddatblygiadol ac ymdrinnir â nhw mewn ffordd sensitif. Rydym wedi myfyrio ar adborth o ystod eang o ffynonellau, gan gynnwys athrawon, rhieni a gofalgwyr, arbenigwyr a rhanddeiliaid ehangach. Mae'n amlwg bod effaith pornograffi yn broblem enfawr, ac yn un y bydd plant a phobl ifanc ledled Cymru yn ei chael yn anodd iawn ei hwynebu.

O fewn y Cod Addysg Cydberthynas a Rhywioldeb, bydd ymarferwyr yn ystyried priodoldeb datblygiadol dysgwyr ar gyfer dysgu ar y mater hwn, a phan fo'n briodol, bydd dysgwyr yn datblygu:

*"Deall yr effeithiau sy'n gysylltiedig â deunydd rhywiol ac agosatrywydd ar-lein, gan gynnwys y goblygiadau moesegol a chyfreithiol." Ac, "Ymwybyddiaeth o sut mae deunydd rhywiol a chyfryngau yn aml yn cynrychioli rhyw, gweithgarwch rhywiol, ymddangosiad corfforol a pherthnasoedd mewn ffyrdd afrealistig a niweidiol."*

### Stereoteipiau Rhywedd

Mae'r Cod drafft ar gyfer Addysg Cydberthynas a Rhywioldeb yn amlinellu dysgu ynghylch *'ymddygiadau a normau cadarnhaol a niweidiol a bod â'r hyder i siarad (drostynt eu hunain) ac i siarad ac eirioli dros hawliau a pharch pobl eraill'.*

Mewn datblygiad cynnar dylai'r ymddygiad hwn gael ei fodelu gan ymarferwyr mewn ysgolion a lleoliadau. Fodd bynnag, wrth i ddysgwyr ddatblygu, maent yn symud ymlaen i ddysgu am wybod '*sut i ymateb yn ddiogel i stereoteipiau rhywedd a rhywiol ac ymddygiad annheg a'u herio*'.

*Mae hyn yn arwain at y cyfnod datblygu diweddarach i'r 'gallu i archwilio a deall yn feirniadol sut y gall ystod o normau a dylanwadau cymdeithasol, diwylliannol a chrefyddol am berthnasoedd, rhyw, rhywedd a rhywioldeb lunio canfyddiadau a'n lles a gall fod yn gadarnhaol ac yn niweidiol*'.

#### Datblygu'r Canllawiau a'r Cod Statudol

Ymysg y rhanddeiliaid a ddatblygodd y Canllawiau a'r Cod drafft ar Addysg Cydberthynas a Rhywioldeb, ochr yn ochr ag ymarferwyr, roedd: yr NSPCC, Swyddfa'r Comisiynydd Plant, Estyn, Stonewall Cymru a Chymorth i Fenywod Cymru.

Yn gywir,



**Jeremy Miles AS/MS**  
Gweinidog y Gymraeg ac Addysg  
Minister for Education and Welsh Language